

Lesnan di Lenny

Normal dianan—òf asta simannan—adelantá nos sa ku orkan ta na kaminda. Normal nan ta kuminsá banda di kosta di Afrika i ta sigui e ruta di kustumber bin pabou. Normal nos ta tende di un ola òf tormento tropikal promé ku nos ta tende e palabra orkan. Normal ora un tormento tropikal òf orkan ta pasa den serkania di nos islanan, nos ta na su banda robes, e banda ménos peligroso. Ma Lenny no tabata normal.

Tabata apnormal ku Lenny a kuminsá pabou bin pariba. Segun nos ta komprendé, na dos okashon un tormento tropikal a hasi esei e síglo aki, ma nunca un orkan. Konsekuentemente, maske nos por a tende di desaroyo di un tormento tropikal, nos no a hasi kaso, ni asta ora el a bira orkan. Ademas, tabata apnormal ku nos islanan a keda na e banda peligroso di orkan, esta banda drechi. Nos no por a imaginá loke lo sigui.

Anto e reportahenan a kuminsá drenta. **Rabu** di Lenny a kousa ún morto na Colombia. Biniedo mas pariba, maske puebel arubano a wòrdu avisá, nan no a antispá olanan di tan magnitud, ku konsekuensianan tan desastroso. E ora ei numa nos a kuminsá ripará ku algu serio ta na kaminda. Kosta di Kòrsou tabata e siguiente víktima. Arobe tabata e mesun kaso tristu: daño i destrukshon.

Anto tabata Boneiru su turno. Nos no por a keda sin bai wak durante e tempestad i despues. Loke nos a mira lo keda grabá den nos memoria: olanan brutu, enorme, drentando kurá i kas; laman tan trublá na kosta ku el a keda koló di santu; bientu tan fuerte for di direkshon wèst; barankanan grandi benta riba tera. Durante oranan di anochi, kosta i edifisionan a haña un sota mas formal. Loke a tuma hende añanan pa traha, a desparsé den algun ora; ku daño kalkulá na fl. 18 mion. I sumanesé, laman tabata tan yen di santu ku e koló blou kla tabata visto hopi leu den profundidat.

Despues islanan ariba a hana sla direkt di orkan. Te ainda reportahenan ta inkompleto di e daño i destrukshon.

Lenny a sagudi nos. Sigur nos mester sina algun les.

1) **Lenny mester pone nos evaluá nos konsepto di Dios.** Algun hende na nos isla tin un konsepto panteistiko di Dios, esta ku dios ta tur kos i tur kos ta dios. Kakalaka ta dios, baranka ta dios, laman ta dios, abo ta dios, ami ta dios. Na tempu di orkan, un konsepto asina ta laga nos na kaya. Nos ta pidi Dios pa spar nos. Ma si tantu laman komo abo ta dios, na ken bo ta resa pa skapábo? Si bo ta dios, bo'n tin ningun poder pa skapa bo mes.

2) **Lenny ta mustra riba e poder di Dios.** Nos tur a keda baboká pa e poder spektakular di e olanan feros. Ma kòrda bon, Aruba, Kòrsou, i Boneiru a sufri tur e daño aki siendo 300 kilometer sùit di wowo di e orkan mes! Nos no por yuda di keda impreshoná ku poder di naturalesa...i muchu mas, poder di Kreador di naturalesa. Di berdat, Lenny ta mustra kla kla riba e echo ku Dios tin TUR poder...E ta todopoderoso!

3) **Lenny mester korda nos riba nos sita final ku Dios.** Si furia di laman—kreashon—ta tan spantoso, korda furia di e Kreador kontra esnan ku ta rechas'E. Beibel ta bisa, “...*Senor Hesus* (lo) *wordu manifestá for di shelu ku Su angelnan poderoso den kandela tur na flam, pa duna pago meresi na esnan ku no konosé Dios i na esnan ku no ta obedesé e evangelio di nos Señor Hesus*” (2 Tesalonisensenan 1:7-8). Ningun di nos por skapa e sita ei. Si bo no a konfia Kristo **so** pa skapábo di Dios Su rabia hustu kontra bo piká, no tin skapatorio.

Bo tin ku prepará pa dia di Dios Su huisio. E dia ei, furia di Lenny lo parse ko'i hunga kompará ku furia di Dios!